



Број/ Број : 02/2-50-1-13-10-4/08

Сарајево/ Сарајево : 05.02.2008. године

ZAPISNIK

10. sjednice Komisije za vanjsku i trgovinsku politiku, carine, saobraćaj i komunikacije

Doma naroda

Parlamentarne skupštine Bosne i Hercegovine, održane 31.01.2008. godine

Desetu sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH sazvala je predsjedavajuća Komisije, Alma Čolo.

Sjednici Komisije za vanjsku i trgovinsku politiku, carine, saobraćaj i komunikacije Doma naroda, u svojstvu članova Komisije, prisustvovali su: Alma Čolo, Adem Ibrahimpašić, Rudo Vidović i Dušanka Majkić, te Aida Kreho – stručni saradnik u Komisiji.

Odsustvo su opravdali Branko Zrno i Slobodan Šaraba.

Sjednici su, u svojstvu predlagača i posmatrača, prisustvovali: Miodrag Pandurević – pomoćnik ministra u Ministarstvu civilnih poslova BiH, te Zdravko Marinković iz Vanjskotrговинске коморе BiH.

Sjednica Komisije za vanjsku i trgovinsku politiku, carine, saobraćaj i komunikacije Doma naroda BiH započela je u 9 sati.

Nakon što je konstatovala da postoji kvorum, predsjedavajuća Komisije, Alma Čolo, predložila je sljedeći

DNEVNI RED

1. Razmatranje Prijedloga zakona o izmjenama i dopunama Zakona o putnim ispravama (prvo čitanje), predlagač: Vijeće ministara Bosne i Hercegovine;
2. Tekuća pitanja
Dnevni red je jednoglasno usvojen.

Ad.1. Razmatranje Prijedloga zakona o izmjenama i dopunama Zakona o putnim ispravama (prvo čitanje), predlagač: Vijeće ministara Bosne i Hercegovine

Uvodnu riječ o Prijedlogu zakona dao je g. Pandurević iz Ministarstva civilnih poslova BiH. Istaknuo je kako je osnovni cilj izmjena i dopuna Zakona o putnim ispravama, uvođenje biometrijskih pasoša za bosansko-hercegovačke državljanine, koji će im omogućiti, prije svega olakšanje, a zatim i ukidanje viznog režima.

Gđa. Majkić je postavila pitanje koje se odnosilo na finansijska sredstva neophodna za provedbu zamjene putnih isprava građana.

G. Pandurević je naglasio da su u Budžetu za 2008. godinu planirana sredstva u iznosu od 2.4 miliona KM za nabavku opreme i softvera, te 3.2 miliona KM za nabavku pasoških obrazaca. U skladu sa dinamikom, koju je Vijeće ministara usvojilo, sa izdavanjem pasoša krenut će se 01.11.2008. godine, s tim da građani neće biti dužni mijenjati svoje putne isprave prije nego im istekne važnost. Također, a kao odgovor na postavljeno pitanje, g. Pandurević je naglasio kako smatra da neće biti potrebe za povećanjem cijene koštanja novih putnih isprava.

Na odredbu člana 5. koji se odnosi na sadržaj putne isprave osvrnula se gđa. Čolo, koja smatra da je neophodno da sadržaj putne isprave bude tačno definisan, što nije slučaj u predloženim izmjenama i dopunama.

G. Pandurević je, u vezi sa konstatacijom gđe. Čolo, istaknuo da je razlog ovakvog regulisanja praktične prirode. Naime, obzirom da pitanje vrste čipa nije standardizovano, prvo se mora odlučiti koji čip se može ugraditi u putnu ispravu, pa se tek onda treba ići sa definisanjem sadržaja putne isprave (u podzakonskom aktu).

Članovi Komisije jednoglasno su podržali principe Prijedloga zakona o izmjenama i dopunama Zakona o putnim ispravama.

Ad.2. Tekuća pitanja

Rasprava nije vođena.

Sjednica Komisije završena je u 10:20 sati.

Stručni saradnik u Komisiji
za vanjsku i trgovinsku politiku,
carine, saobraćaj i komunikacije
Aida Kreho

Predsjedavajuća Komisije
za vanjsku i trgovinsku politiku,
carine, saobraćaj i komunikacije
Alma Čolo